

昌谷集 唐 李贺

提要

原序

卷一

卷二

卷三

卷四

外集

补遗

李长吉小传

提要

《昌谷集》四卷、《外集》一卷，唐李贺撰。贺事迹具《新唐书·文学传》。案贺系出郑王，故自以郡望称陇西。实则家於昌谷。昌谷地近洛阳，於唐为福昌县，今为宜阳县地。集中屡言归昌谷。宋张耒集有《春游昌谷访长吉故宅》诗。又《福昌怀古》诗中亦有《李贺宅》一首。其明证矣。《幽闲鼓吹》称贺遗诗为其表兄投溷中，故流传者少。然但谓李藩所收耳。其沈子明所编、杜牧所序者，实未尝亡。牧序述子明之书，称“贺且死，尝授我平生所著歌诗，厘为四编，凡二百三十三首”。则卷帙并贺所手定也。唐、宋志皆称贺集五卷，较牧序多一卷。检《文献通考》始知为集四卷，外集一卷。吴正子《昌谷集笺注》曰：“京师本无后卷。有后卷，鲍本也。尝闻薛常州士龙言：‘长吉诗蜀本、会稽姚氏本皆二百一十九篇，宣城本二百四十二篇’云云。盖外集诗二十三首，合之则为二百四十二，除之则为二百一十九。实即一本也。惟正集较杜牧所序少十四首，而《外集》较黄伯思《东观馀论》所跋少二十九首，则莫可考耳。《乐府诗集》载有贺《静女春曙曲》一首、《少年乐》一首，今本皆无之。得非伯思藏本所佚耶！”正子又谓外集词意俚浅，不类贺作，殆出后人摹仿。然正集如《苦篁调》、《啸引》之类，句格鄙率，亦不类贺作。古人操觚，亦时有利钝。如杜甫诗之“林热鸟开口，水浑鱼掉头”，使非刊在本集，谁信为甫作哉！疑以传疑可矣。

原序

太和五年十月中，半夜时，舍外有疾呼传缄书者，牧曰：“必有异，亟取火来！”及发之，果集贤学士沈公子明书一通，曰：“我亡友李贺，元和中

，义爱甚厚，日夕相与起居饮食。贺且死，尝授我平生所著歌诗，离为四编，凡二百三十三首。数年来东西南北，良为已失去；今夕醉解，不复得寐，即阅理篋帙，忽得贺诗前所授我者。思理往事，凡与贺话言嬉游，一处所，一物候，一日一夕，一觞一饭，显显然无有忘弃者，不觉出涕。贺复无家室子弟，得以给养恤问。尝恨想其人咏味其言止矣！子厚于我，与我为贺序，尽道其所来由，亦少解我意。”牧其夕不果，以书道不可，明日就公谢，且曰：“世谓贺才绝出于前。”让居数日，牧深惟公曰：“公于诗为深妙奇博，且复尽知贺之得失短长。今实叙贺不让，必不能当公意，如何？”复就谢，极道所不敢叙贺。公曰：“子固若是，是当慢我。”牧因不敢复辞，勉为贺叙，终甚惭。

贺，唐皇诸孙，字长吉。元和中，韩吏部亦颇道其歌诗。云烟绵联，不足为其态也；水之迢迢，不足为其情也；春之盎盎，不足为其和也；秋之明洁，不足为其格也；风樯阵马，不足为其勇也；瓦棺篆鼎，不足为其古也；时花美女，不足为其色也；荒国侈殿，梗莽邱垄，不足为其怨恨悲愁也；鲸呿鳌掷，牛鬼蛇神，不足为其虚荒诞幻也。盖骚之苗裔，理虽不及，辞或过之。骚有感怨刺怫，言及君臣理乱，时有以激发人意。乃贺所为，得无有是？贺能探寻前事，所以深叹恨古今未尝经道者，如金铜仙人辞汉歌、补梁庾肩吾宫体谣。求取情状，离绝远去笔墨畦径间，亦殊不能知之。贺生二十七年死矣！世皆曰：使贺且未死，少加以理，奴仆命骚可也。贺死后凡十有五年，京兆杜牧为其叙。

## 卷一

### 李凭箜篌引

吴丝蜀桐张高秋，空山凝云颓不流。江娥啼竹素女愁，李凭中国弹箜篌。昆山玉碎凤凰叫，芙蓉泣露香兰笑。十二门前融冷光，二十三丝动紫皇。女娲炼石补天处，石破天惊逗秋雨。梦入神山教神姬，老鱼跳波瘦蛟舞。吴质不眠倚桂树，露脚斜飞湿寒兔。

### 残丝曲

垂杨叶老莺哺儿，残丝欲断黄蜂归。绿鬓年少金钗客，缥粉壶中沉琥珀。花台欲暮春辞去，落花起作回风舞。榆荚相催不知数，沈郎青钱夹城路。

### 还自会稽歌【并序】

庾肩吾于梁时，尝作宫体谣引，以应和皇子。及国势沦败，肩吾先潜难会稽，后始还家。仆意其必有遗文，今无得焉，故作《还自会稽歌》以补其悲。

野粉椒壁黄，湿萤满梁殿。台城应教人，秋衾梦铜辇。吴霜点归鬓，身与塘蒲晚。脉脉辞金鱼，羈臣守迍贱。

出城寄权璩杨敬之

草暖云昏万里春，宫花拂面送行人。自言汉剑当飞去，何事还车载病身？

示弟

别弟三年后，还家一日余。醪醕今夕酒，缃帙去时书。病骨犹能在，人间底事无？何须问牛马，抛掷任臯卢！

竹

入水文光动，抽空绿影春。露华生笋径，苔色拂霜根。织可承香汗，裁堪钓锦鳞。三梁曾入用，一节奉王孙。

同沈驸马赋得御沟水

入苑白泱泱，宫人正靛黄。绕堤龙骨冷，拂岸鸭头香。别馆惊残梦，停杯泛小觞。幸因流浪处，暂得见何郎。

始为奉礼忆昌谷山居

扫断马蹄痕，衙回自闭门。长镵江米熟，小树枣花春。向壁悬如意，当帘阅角巾。犬书曾去洛，鹤病悔游秦。土甑封茶叶，山杯锁竹根。不如船上月，谁棹满溪云！

七夕

别浦今朝暗，罗帷午夜愁。鹊辞穿线月，花入曝衣楼。天上分金镜，人间望玉钩。钱塘苏小小，更值一年秋。

过华清宫

春月夜啼鸦，宫帘隔御花。云生朱络暗，石断紫钱斜。玉碗盛残露，银灯点旧纱。蜀王无近信，泉上有芹芽。

送沈亚之歌【并序】

文人沈亚之，元和七年，以书不中第，返归于吴江。吾悲其行，无钱酒以劳，又感沈之勤请，乃歌一解以送之。

吴兴才人怨春风，桃花满陌千里红。紫丝竹断骢马小，家住钱塘东复东。白藤交穿织书笈，短策齐裁如梵夹。雄光宝矿献春卿，烟底暮波乘一叶。春卿拾才白日下，掷置黄金解龙马。携笈归江重入门，劳劳谁是怜君者？吾闻壮夫重心骨，古人三走无摧挫。请君待旦事长鞭，他日还辕及秋律。

咏怀二首

长卿怀茂陵，绿草垂石井。弹琴看文君，春风吹鬓影。梁王与武帝，弃之如断梗。惟留一简书，金泥泰山顶。

其二

日夕著书罢，惊霜落素丝。镜中聊自笑，讵是南山期。头上无幅巾，苦蘖已染衣。不见清溪鱼，饮水得相宜。

### 追和柳恹

汀洲白蘋草，柳恹乘马归。江头栎树香，岸上蝴蝶飞。酒杯箬叶露，玉轸蜀桐虚。朱楼通水陌，沙暖一双鱼。

### 春坊正字剑子歌

先辈匣中三尺水，曾入吴潭斩龙子。隙月斜明刮露寒，练带平铺吹不起。蛟胎皮老蒺藜刺，鸂鶒淬花白鹇尾。直是荆轲一片心，莫教照见春坊字。绛丝团金悬■〈屮上鹿下〉■〈屮上敕下〉，神光欲截蓝田玉。提出西方白帝惊，嗷嗷鬼母秋郊哭。

### 贵公子夜阑曲

袅袅沉水烟，乌啼夜阑景。曲沼芙蓉波，腰围白玉冷。

### 雁门太守行

黑云压城城欲摧，甲光向月金鳞开。角声满天秋色里，塞上燕脂凝夜紫。半卷红旗临易水，霜重鼓寒声不起。报君黄金台上意，提携玉龙为君死。

### 大堤曲

妾家住横塘，红纱满桂香。青云教绾头上髻，明月与作耳边珰。莲风起，江畔春；大堤上，留北人。郎食鲤鱼尾，妾食猩猩唇。莫指襄阳道，绿浦归帆少。今日菖蒲花，明朝枫树老。

### 蜀国弦

枫香晚花静，锦水南山影。惊石坠猿哀，竹云愁半岭。凉月生秋浦，玉沙粼粼光。谁家红泪客，不忍过瞿塘。

### 苏小小墓

幽兰露，如啼眼。无物结同心，烟花不堪剪。草如茵，松如盖。风为裳，水为珮。油壁车，夕相待。冷翠烛，劳光彩。西陵下，风吹雨。

### 梦天

老兔寒蟾泣天色，云楼半开壁斜白。玉轮轧露湿团光，鸾珮相逢桂香陌。黄尘清水三山下，更变千年如走马。遥望齐州九点烟，一泓海水杯中泻。

### 唐儿歌【杜邕公之子】

头玉硃硃眉刷翠，杜郎生得真男子。骨重神寒天庙器，一双瞳人剪秋水。竹马梢梢摇绿尾，银鸾睨光踏半臂。东家娇娘求对值，浓笑书空作唐字。眼大心雄知所以，莫忘作歌人姓李。

### 绿章封事【为吴道士夜醮作】

青霓扣额呼宫神，鸿龙玉狗开天门。石榴花发满溪津，溪女洗花染白云。绿章封事谏元父，六街马蹄浩无主。虚空风气不清冷，短衣小冠作尘土。金家香弄千轮鸣，扬雄秋室无俗声。愿携汉戟招书鬼，休令恨骨填蒿里。

## 河南府试十二月乐词【并闰月】

### 正月

正月上楼迎春归，暗黄著柳宫漏迟。薄薄淡霭弄野姿，寒绿幽风生短丝。锦床晓卧玉肌冷，露脸未开对朝暝。官街柳带不堪折，早晚菖蒲胜绾结。

### 二月

二月饮酒采桑津，宜男草生兰笑人，蒲如交剑风如薰。劳劳胡燕怨酣春，薇帐逗烟生绿尘。金翘峨髻愁暮云，沓飒起舞真珠裙。津头送别唱《流水》，酒客背寒南山死。

### 三月

东方风来满眼春，花城柳暗愁杀人。复宫深殿竹风起，新翠舞衿净如水。光风转蕙百余里，暖雾驱云扑天地。军装宫妓扫蛾浅，摇摇锦旗夹城暖。曲水飘香去不归，梨花落尽成秋苑。

### 四月

晓凉暮凉树如盖，千山浓绿生云外。依微香雨青氛氲，膩叶蟠花照曲门。金塘闲水摇碧漪，老景沉重无惊飞，堕红残萼暗参差。

### 五月

雕玉押帘额，轻縠笼虚门。井汲铅华水，扇织鸳鸯纹。回雪舞凉殿，甘露洗空绿。罗袖从徊翔，香汗沾宝粟。

### 六月

裁生罗，伐湘竹，帔拂疏霜簟秋玉。炎炎红镜东方开，晕如车轮上徘徊，啾啾赤帝骑龙来。

### 七月

星依云渚冷，露滴盘中圆。好花生木末，衰蕙愁空园。夜天如玉砌，池叶极青钱。仅厌舞衫薄，稍知花簟寒。晓风何拂拂，北斗光阑干。

### 八月

嬾妾怨夜长，独客梦归家。傍檐虫缉丝，向壁灯垂花。帘外月光吐，帘内树影斜。悠悠飞露姿，点缀池中荷。

### 九月

离宫散萤天似水，竹黄池冷芙蓉死。月缀金铺光脉脉，凉苑虚庭空澹白。露花飞飞风草草，翠锦斓斑满层道。鸡人罢唱晓珑璁，鸦啼金井下疏桐。

### 十月

玉壶银箭稍难倾，缸花夜笑凝幽明。碎霜斜舞上罗幕，烛笼两行照飞阁。珠帷怨卧不成眠，金凤刺衣著体寒，长眉对月斗弯环。

### 十一月

宫城团回凛严光，白天碎碎堕琼芳。挝钟高饮千日酒，却天凝寒作君寿。  
御沟泉合如环素，火井温泉在何处？

十二月

日脚淡光红洒洒，薄霜不销桂枝下。依稀和气排冬严，已就长日辞长夜。

闰月

帝重光，年重时。七十二候回环推，天官玉琯灰剩飞。今岁何长来岁迟，  
王母移桃献天子，羲氏、和氏迁龙辔。

天上谣

天河夜转漂回星，银浦流云学水声。玉宫桂树花未落，仙妾采香垂珮缨。  
秦妃卷帘北窗晓，窗前植桐青凤小。王子吹笙鹅管长，呼龙耕烟种瑶草。粉霞  
红绶藕丝裙，青洲步拾兰苕春。东指羲和能走马，海尘新生石山下。

浩歌

南风吹山作平地，帝遣天吴移海水。王母桃花千遍红，彭祖、巫咸几回死？  
青毛骢马参差钱，娇春杨柳含细烟。箏人劝我金屈卮，神血未凝身问谁？不  
须浪饮丁都护，世上英雄本无主。买丝绣作平原君，有酒唯浇赵州土。漏催水  
咽玉蟾蜍，卫娘发薄不胜梳。看见秋眉换新绿，二十男儿那刺促！

秋来

桐风惊心壮士苦，衰灯络纬啼寒素。谁看青简一编书，不遣花虫粉空蠹？  
思牵今夜肠应直，雨冷香魂吊书客。秋坟鬼唱鲍家诗，恨血千年土中碧。

帝子歌

洞庭明月一千里，凉风雁啼天在水。九节菖蒲石上死，湘神弹琴迎帝子。  
山头老桂吹古香，雌龙怨吟寒水光。沙浦走鱼白石郎，闲取真珠掷龙堂。

秦王饮酒

秦王骑虎游八极，剑光照空天自碧。羲和敲日玻璃声，劫灰飞尽古今平。  
龙头泻酒邀酒星，金槽琵琶夜枰枰，洞庭雨脚来吹笙。酒酣喝月使倒行，银云  
栊栊瑶殿明，宫门掌事报一更。花楼玉凤声娇狞，海绡红文香浅清，黄鹄跌舞  
千年觥。仙人烛树蜡烟轻，清琴醉眼泪泓泓。

洛姝真珠

真珠小娘下青廓，洛苑香风飞绰绰。寒鬓斜钗玉燕光，高楼唱月敲悬珰。  
兰风桂露洒幽翠，红弦袅云咽深思。花袍白马不归来，浓蛾叠柳香唇醉。金鹅  
屏风蜀山梦，鸾裙凤带行烟重；八骢笼晃脸差移，日丝繁散曛罗洞。市南曲陌  
无秋凉，楚腰卫鬓四时芳。玉喉窈窕排空光，牵云曳雪留陆郎。

李夫人

紫皇宫殿重重开，夫人飞入琼瑶台。绿香绣帐何时歇？青云无光宫水咽。

翩联桂花坠秋月，孤鸾惊啼商丝发。红壁阑珊悬佩珰，歌台小妓遥相望。玉蟾滴水鸡人唱，露华兰叶参差光。

### 走马引

我有辞乡剑，玉锋堪截云。襄阳走马客，意气自生春。朝嫌剑花净，暮嫌剑光冷。能持剑向人，不解持照身。

### 湘妃

筠竹千年老不死，长伴秦娥盖湘水。蛮娘吟弄满寒空，九山静绿泪花红。离鸾别凤烟梧中，巫云蜀雨遥相通。幽愁秋气上青枫，凉夜波间吟古龙。

### 南园十三首

花枝草蔓眼中开，小白长红越女腮。可怜日暮嫣香落，嫁与春风不用媒。

### 其二

宫北田塍晓气酣，黄桑饮露宰宫帘。长腰健妇偷攀折，将喂吴王八茧蚕。

### 其三

竹里缲丝挑网车，青蝉独噪日光斜。桃胶迎夏香琥珀，自课越佣能种瓜。

### 其四

三十未有二十余，白日长饥小甲蔬。桥头长老相哀念，因遗《戎韬》一卷书。

### 其五

男儿何不带吴钩？收取关山五十州。请君暂上凌烟阁，若个书生万户侯？

### 其六

寻章摘句老雕虫，晓月当帘挂玉弓。不见年年辽海上，文章何处哭秋风？

### 其七

长卿牢落悲空舍，曼倩诙谐取自容。见买若耶溪水剑，明朝归去事猿公。

### 其八

春水初生乳燕飞，黄蜂小尾扑花归。窗含远色通书幌，鱼拥香钩近石矶。

### 其九

泉沙奕卧鸳鸯暖，曲岸回篙舴艋迟。泻酒木兰椒叶盖，病容扶起种菱丝。

### 其十

边让今朝忆蔡邕，无心裁曲卧春风。舍南有竹堪书字，老去溪头作钓翁。

### 其十一

长峦谷口倚嵇家，白昼千峰老翠华。自履藤鞋收石蜜，手牵苔絮长莼花。

### 其十二

松溪黑水新龙卵，桂洞生硝旧马牙。谁遣虞卿裁道帙，轻绡一匹染朝霞。

### 其十三

小树开朝径，长茸湿夜烟。柳花惊雪浦，麦雨涨溪田。古刹疏钟度，遥岚破月悬。沙头敲石火，烧竹照渔船。

## 卷二

### 金铜仙人辞汉歌【并序】

魏明帝青龙元年八月，诏宫官牵车西取汉孝武捧露盘仙人，欲立置前殿。宫官既拆盘，仙人临载乃潸然泪下。唐诸王孙李长吉遂作《金铜仙人辞汉歌》。

茂陵刘郎秋风客，夜闻马嘶晓无迹。画栏桂树悬秋香，三十六宫土花碧。魏官牵车指千里，东关酸风射眸子。空将汉月出宫门，忆君清泪如铅水。衰兰送客咸阳道，天若有情天亦老！携盘独出月荒凉，渭城已远波声小。

### 古悠悠行

白景归西山，碧华上迢迢。今古何处尽？千岁随风飘。海沙变成石，鱼沫吹秦桥。空光远流浪，铜柱从年消。

### 黄头郎

黄头郎，捞拢去不归。南浦芙蓉影，愁红独自垂。水弄湘娥珮，竹啼山露月。玉瑟调青门，石云湿黄葛。沙上蘼芜花，秋风已先发。好持扫罗荐，香出鸳鸯热。

### 马诗二十三首

龙脊贴连钱，银蹄白踏烟。无人织锦韉，谁为铸金鞭？

### 其二

腊月草根甜，天街雪似盐。未知口硬软，先拟蒺藜衔。

### 其三

忽忆周天子，驱车上玉山。鸣驺辞凤苑，赤骥最承恩。

### 其四

此马非凡马，房星本是星。向前敲瘦骨，犹自带铜声。

### 其五

大漠沙如雪，燕山月似钩。何当金络脑，快走踏清秋。

### 其六

饥卧骨查牙，粗毛刺破花。鬣焦朱色落，发断锯长麻。

### 其七

西母酒将阑，东王饭已干。君王若燕去，谁为拽车辕？

### 其八

赤兔无人用，当须吕布骑。吾闻果下马，羈策任蛮儿。

其九

飏叔去匆匆，如今不豢龙。夜来霜压栈，骏骨折西风。

其十

催榜渡乌江，神骓泣向风。君王今解剑，何处逐英雄？

其十一

内马赐宫人，银鞴刺麒麟。午时盐坂上，蹭蹬溘风尘。

其十二

批竹初攒耳，桃花未上身。他时须搅阵，牵去借将军。

其十三

宝玦谁家子？长闻侠骨香。堆金买骏骨，将送楚襄王。

其十四

香襍赭罗新，盘龙蹙镫鳞。回看南陌上，谁道不逢春？

其十五

不从桓公猎，何能伏虎威？一朝沟陇出，看取拂云飞。

其十六

唐剑斩隋公，（𠂔上毛下）毛属太宗。莫嫌金甲重，且去捉飘风。

其十七

白铁剉青禾，砧间落细莎。世人怜小颈，金埒畏长牙。

其十八

伯乐向前看，旋毛在腹间。只今掇白草，何日蓦青山？

其十九

萧寺驮经马，元从竺国来。空知有善相，不解走章台。

其二十

重围如燕尾，宝剑似鱼肠。欲求千里脚，先采眼中光。

其二十一

暂系腾黄马，仙人上彩楼。须鞭玉勒吏，何事谪高州？

其二十二

汗血到王家，随鸾撼玉珂。少君骑海上，人见是青骡。

其二十三

武帝爱神仙，烧金得紫烟。厩中皆肉马，不解上青天。

申胡子觥策歌【并序】

申胡子，朔客之苍头也。朔客李氏，本亦世家子，得祀江夏王庙，当年践履失序，遂奉官北部。自称学长调短调，久未知名。今年四月，吾与对舍于长安崇义里，遂将衣质酒，命予合饮。气热杯阑，因谓吾曰：“李长吉，尔徒能

长调，不能作五字歌诗，直强回笔端，与陶、谢诗势相远几里！”吾对后，请撰《申胡子髯策歌》，以五字断句。歌成，左右人合噪相唱。朔客大喜，擎觞起立，命花娘出幕，裴回拜客。吾问所宜，称善平弄，于是以弊辞配声，与予为寿。

颜热感君酒，含嚼芦中声。花娘簪绶妥，休睡芙蓉屏。谁截太平管？列点排空星。直贯开花风，天上驱云行。今夕岁华落，令人惜平生。心事如波涛，中坐时时惊。朔客骑白马，剑悬兰缨。俊健如生猱，肯拾蓬中萤！

#### 老夫采玉歌

采玉采玉须水碧，琢作步摇徒好色。老夫饥寒龙为愁，蓝溪水气无清白。夜雨冈头食蓁子，杜鹃口血老夫泪。蓝溪之水厌生人，身死千年恨溪水。斜山柏风雨如啸，泉脚挂绳青袅袅。村寒白屋念娇婴，古台石磴悬肠草。

#### 伤心行

咽咽学楚吟，病骨伤幽素。秋姿白发生，木叶啼风雨。灯青兰膏歇，落照飞蛾舞。古壁生凝尘，羁魂梦中语。

#### 湖中曲

长眉越沙采兰若，桂叶水荇春漠漠。横船醉眠白昼闲，渡口梅风歌扇薄。燕钗玉股照青渠，越王娇郎小字书。蜀纸封巾报云鬓，晚漏壶中水淋尽。

#### 黄家洞

雀步蹙沙声促促，四尺角弓青石镞。黑幡三点铜鼓鸣，高作猿啼摇箭箛。彩巾缠踣幅半斜，溪头簇队映葛花。山潭晚雾吟白鼉，竹蛇飞蠹射金沙。闲驱竹马缓归家，官军自杀容州槎。

#### 屏风曲

蝶栖石竹银交关，水凝绿鸭琉璃钱。团回六曲抱膏兰，将鬟镜上掷金蝉。沉香火暖茱萸烟，酒觥绾带新承欢。月风吹露屏外寒，城上乌啼楚女眠。

#### 南山田中行

秋野明，秋风白，塘水漻漻虫啧啧。云根苔藓山上石，冷红泣露娇啼色。荒畦九月稻叉牙，蛰萤低飞陇径斜。石脉水流泉滴沙，鬼灯如漆点松花。

#### 贵主征行乐

奚骑黄铜连锁甲，罗旗香干金画叶。中军留醉河阳城，娇嘶紫燕踏花行。春营骑将如红玉，走马捎鞭上空绿。女垣素月角咿咿，牙帐未开分锦衣。

#### 酒罢张大彻索赠诗时张初效潞幕

长鬣张郎三十八，天遣裁诗花作骨。往还谁是龙头人？公主遣乘鱼须笏。水行青草上白衫，匣中章奏密如蚕。金门石阁知卿有，豸角鸡香早晚含。陇西长吉摧颓客，酒阑感觉中区窄。葛衣断碎赵城秋，吟诗一夜东方白。

## 罗浮山人与葛篇

依依宜织江雨空，雨中六月兰台风。博罗老仙时出洞，千岁石床啼鬼工。  
蛇毒浓凝洞堂湿，江鱼不食衔沙立。欲剪湘中一尺天，吴娥莫道吴刀涩。

## 仁和里杂叙皇甫湜【湜新尉陆浑】

大人乞马癯乃寒，宗人贷宅荒厥垣。横庭鼠径空土涩，出篱大枣垂珠残。  
安定美人截黄绶，脱落缨裾暝朝酒。还家白笔未上头，使我清声落人后。  
枉辱称知犯君眼，排引才升强絙断。洛风送马入长关，阖扇未开逢瘦犬。  
那知坚都相草草，客枕幽单看春老。归来骨薄面无膏，疫气冲头鬓茎少。  
欲雕小说干天官，宗孙不调为谁怜！明朝下元复西道，崆峒叙别长如天。

## 宫娃歌

蜡光高悬照纱空，花房夜捣红守宫。象口吹香氎■〈登毛〉暖，七星挂城闻漏板。  
寒入罽毼殿影昏，彩鸾帘额著霜痕。啼蛄吊月钩阑下，屈膝铜铺锁阿甄。  
梦入家门上沙渚，天河落处长洲路。愿君光明如太阳，放妾骑鱼撇波去。

## 堂堂

堂堂复堂堂，红脱梅灰香。十年粉蠹生画梁，饥虫不食摧碎黄。蕙花已老桃叶长，  
禁院悬帘隔御光。华清源中礲石汤，徘徊白凤随君王。

## 勉爱行二首送小季之庐山

洛郊无俎豆，弊厩惭老马。小雁过炉峰，影落楚水下。长船倚云泊，石镜秋凉夜。  
岂解有乡情？弄月聊鸣哑。

## 其二

别柳当马头，官槐如兔目。欲将千里别，持此易斗粟。南云北云空脉断，  
灵台经络悬春线。青轩树转月满床，下国饥儿梦中见。维尔之昆二十馀，年来持镜颇有须。  
辞家三载今如此，索米王门一事无。荒沟古水光如刀，庭南拱柳生蛭蟠。  
江干幼客真可念，郊原晚吹悲号号。

## 致酒行

零落栖迟一杯酒，主人奉觞客长寿。主父西游困不归，家人折断门前柳。  
吾闻马周昔作新丰客，天荒地老无人识。空将笺上两行书，直犯龙颜请恩泽。  
我有迷魂招不得，雄鸡一声天下白。少年心事当拿云，谁念幽寒坐呜呃。

## 长歌续短歌

长歌破衣襟，短歌断白发。秦王不可见，旦夕成内热。渴饮壶中酒，饥拔陇头粟。  
凄凉四月阑，千里一时绿。夜峰何离离，明月落石底。徘徊沿石寻，照出高峰外。  
不得与之游，歌成鬓先改。

## 公莫舞歌【并序】

《公莫舞歌》者，咏项伯翼蔽刘沛公也。会中壮士，灼灼于人，故无复书

；且南北乐府率有歌引。贺陋诸家，今重作《公莫舞歌》云。

方花古础排九楹，刺豹淋血盛银鬕。华筵鼓吹无桐竹。长刀直立割鸣箏。横楣粗锦生红纬，日炙锦嫣王未醉。腰下三看宝玦光，项庄掉箭拦前起。材官小臣公莫舞，座上真人赤龙子。芒砀云瑞抱天回，咸阳王气清如水。铁枢铁槌重束关，大旗五丈撞双环。汉王今日须秦印，绝膑刳肠臣不论。

#### 昌谷北园新笋四首

箨落长竿削玉开，君看母笋是龙材。更容一夜抽千尺，别却池园数寸泥。

#### 其二

斫取青光写《楚辞》，腻香春粉黑离离。无情有恨何人见？露压烟啼千万枝。

#### 其三

家泉石眼两三茎，晓看阴根紫陌生。今年水曲春沙上，笛管新篁拔玉青。

#### 其四

古竹老梢惹碧云，茂陵归卧叹清贫。风吹千亩迎雨啸，鸟重一枝入酒樽。

#### 恼公

宋玉愁空断，娇娆粉自红。歌声春草露，门掩杏花丛。注口樱桃小，添眉桂叶浓。晓奁妆秀靥，夜帐减香筒。钿镜飞孤鹊，江图画水葑。陂陀梳碧凤，腰袅带金虫。杜若含清露，河蒲聚紫茸。月分蛾黛破，花合靥朱融。发重疑盘雾，腰轻乍倚风。密书题荳蔻，隐语笑芙蓉。莫锁茱萸匣，休开翡翠笼。弄珠惊汉燕，烧蜜引胡蜂。醉缣抛红网，单罗挂绿蒙。数钱教姹女，买药问巴賁。匀脸安斜雁，移灯想梦熊。肠攒非束竹，肱急是张弓。晚树迷新蝶，残蛩忆断虹。古时填渤澥，今日凿崆峒。绣沓褰长幔，罗裙结短封。心摇如舞鹤，骨出似飞龙。井槛淋清漆，门铺缀白铜。隈花开兔径，向壁印狐踪。玳瑁钉帘薄，琉璃叠扇烘。象床缘素柏，瑶席卷香葱。细管吟朝幌，芳醪落夜枫。宜男生楚巷，栀子发金墉。龟甲开屏涩，鹅毛渗墨浓。《黄庭》留卫瓘，绿树养韩冯。鸡唱星悬柳，鸦啼露滴桐。黄娥初出座，宠妹始相从。蜡泪垂兰烬，秋芜扫绮栊。吹笙翻旧引，沽酒待新丰。短佩愁填粟，长弦怨削崧。曲池眠乳鸭，小阁睡娃僮。褥缝菱双线，钩绦辨五骢。蜀烟飞重锦，峡雨溅轻容。拂镜羞温峤，熏衣避贾充。鱼生玉藕下，人在石莲中。含水湾蛾翠，登楼溷马鬃。使君居曲陌，园令住临邛。桂火流苏暖，金炉细炷通。春迟王子态，莺啭谢娘慵。玉漏三星曙，铜街五马逢。犀株防胆怯，银液镇心忪。跳脱看年命，琵琶道吉凶。王时应七夕，夫位在三宫。无力涂云母，多方带药翁。符因青鸟送，囊用绛纱缝。汉苑寻官柳，河桥阁禁钟。月明中妇觉，应笑画堂空。

#### 感讽五首

合浦无明珠，龙洲无木奴。足知造化力，不给使君须。越妇未织作，吴蚕始蠕蠕。县官骑马来，狞色虬紫须。怀中一方板，板上数行书。“不因使君怒，焉得诣尔庐？”越妇拜县官：“桑牙今尚小。会待春日晏，丝车方掷掉。”越妇通言语，小姑具黄粱。县官踏飧去，簿吏复登堂。

其二

奇俊无少年，日车何躑躅。我待纁双绶，遗我星星发。都门贾生墓，青蝇久断绝。寒食摇扬天，愤景长肃杀。皇汉十二帝，惟帝称睿哲。一夕信竖儿，文明永沦歇！

其三

南山何其悲？鬼雨洒空草。长安夜半秋，风前几人老！低迷黄昏径，袅袅青栎道。月午树立影，一山惟白晓。漆炬迎新人，幽圻萤扰扰。

其四

星尽四方高，万物知天曙。已生须已养，荷担出门去。君平久不反，康伯遁国路。晓思何遑遑，阒阒千人语。

其五

石根秋水明，石畔秋草瘦。侵衣野竹香，蛰蛰垂叶厚。岑中月归来，蟾光挂空秀。桂露对仙娥，星星下云逗。凄凉梔子落，山璺泣清漏。下有张仲蔚，披书案将朽。

三月过行宫

渠水红繁拥御墙，风娇小叶学娥妆。垂帘几度青春老，堪锁千年白日长。

卷三

追和何谢铜雀妓

佳人一壶酒，秋容满千里。石马卧新烟，忧来何所似？歌声且潜弄，陵树风自起。长裾压高台，泪眼看花机。

送秦光禄北征

北虏胶堪折，秋沙乱晓颿。髯胡频犯塞，骄气似横霓。灞水楼船渡，营门细柳开。将军驰白马，豪彦骋雄材。箭射欃枪落，旗悬日月低。榆稀山易见，甲重马频嘶。天远星光没，沙平草叶齐。风吹云路火，雪污玉关泥。屡断呼韩颈，曾燃董卓脐。太常犹旧宠，光禄是新隄。宝玦麒麟起，银壶狔犬啼。桃花连马发，彩絮扑鞍来。呵臂悬金斗，当唇注玉巵。清苏和碎蚁，紫膩卷浮杯。虎鞞先蒙马，鱼肠且断犀。■〈走参〉■〈走覃〉西旅狗，蹙额北方奚。守帐然香暮，看鹰永夜栖。黄龙就别镜，青冢念阳台。周处长桥役，侯调短弄哀。钱塘阶凤羽，正室擘鸾钗。内子攀琪树，羌儿奏《落梅》。今朝擎剑去，何

日刺蛟回？

酬答二首

金鱼公子夹衫长，密装腰鞬割玉方。行处春风随马尾，柳花偏打内家香。

其二

雍州二月梅池春，御水鵀鵲暖白蘋。试问酒旗歌板地，今朝谁是拗花人？

画角东城

河转曙萧萧，鸦飞睥睨高。帆长摺越甸，壁冷挂吴刀。淡菜生寒日，鲙鱼溼白涛。水花沾抹额，旗鼓夜迎潮。

谢秀才自睦州来换韵  
谢秀才有妾缟练改从于人秀才引留之不得后生感忆座人制诗嘲诮贺复继四首

谁知泥忆云？望断梨花春。荷丝制机练，竹叶剪花裙。月明啼阿姐，灯暗会良人。也识君夫婿，金鱼挂在身。

其二

铜镜立青鸾，燕脂拂紫绵。腮花弄暗粉，眼尾泪侵寒。碧玉破不复，瑶琴重拨弦。今日非昔日，何人敢正看？

其三

洞房思不禁，蜂子作花心。灰暖残香炷，发冷青虫簪。夜遥灯焰短，睡熟小屏深。好作鸳鸯梦，南城罢捣砧。

其四

寻常轻宋玉，今日嫁文鸯。戟干横龙簷，刀环倚桂窗。邀人裁半袖，端坐据胡床。泪湿红轮重，栖乌上井梁。

昌谷读书示巴童

虫响灯光薄，宵寒药气浓。君怜垂翅客，辛苦尚相从。

巴童答

巨鼻宜山褐，庞眉入苦吟。非君唱乐府，谁识怨秋深？

代崔家送客

行盖柳烟下，马蹄白翩翩。恐送行处尽，何忍重扬鞭！

出城

雪下桂花稀，啼乌被弹归。关水乘驴影，秦风帽带垂。入乡试万里，无印自堪悲。卿卿忍相问，镜中双泪姿。

莫种树

园中莫种树，种树四时愁。独睡南床月，今秋似去秋。

将发

东床卷席罢，护落将行去。秋白遥遥空，日满门前路。

### 追赋画江潭苑四首

吴苑晓苍苍，宫衣水溅黄。小鬟红粉薄，骑马珮珠长。路指台城迥，罗薰裤褶香。行云沾翠辇，今日似襄王。

### 其二

宝袜菊衣单，蕉花密露寒。水光兰泽叶，重带剪刀钱。角暖盘弓易，靴长上马难。泪痕沾寝帐，匀粉照金鞍。

### 其三

剪翅小鹰斜，绦根玉镞花。秋垂妆钿粟，箭箠钉文牙。狒狒啼深竹，鸂鶒老湿沙。宫官烧蜡火，飞烬污铅华。

### 其四

十骑簇芙蓉，宫衣小队红。练香熏宋鹊，寻箭踏卢龙。旗湿金铃重，霜乾玉镫空。今朝画眉早，不待景阳钟。

### 潞州张大宅病酒遇江使寄上十四兄

秋至昭关后，当知赵国寒。系书随短羽，写恨破长笺。病客眠清晓，疏桐坠绿鲜。城鸦啼粉堞，军吹压芦烟。岸帻褰纱幌，枯塘卧折莲。木窗银迹画，石磴水痕钱。旅酒侵愁肺，离歌绕懦弦。诗封两条泪，露折一枝兰。莎老沙鸡泣，松干瓦兽残。觉骑燕地马，梦载楚溪船。椒桂倾长席，鲈鲙斫玳筵。岂能忘旧路？江岛滞佳年。

### 难忘曲

夹道开洞门，弱杨低画戟。帘影竹华起，箫声吹日色。蜂语绕妆镜，画蛾学春碧。乱系丁香梢，满栏花向夕。

### 贾公闾贵婿曲

朝衣不须长，分花对袍缝。嚶嚶白马来，满脑黄金重。今朝香气苦，珊瑚涩难枕。且要弄风人，暖蒲沙上饮。燕语踏帘钩，日虹屏中碧。潘令在河阳，无人死芳色。

### 夜饮朝眠曲

觴酣出座东方高，腰横半解星劳劳。柳花鸦啼公主醉，薄露压花蕙兰气。玉转湿丝牵晓水，热粉生香琅玕紫。夜饮朝眠断无事，楚罗之帟卧皇子。

### 王潜墓下作

人间无阿童，犹唱水中龙。白草侵烟死，秋藜绕地红。古书平黑石，神剑断青铜。耕势鱼鳞起，坟科马鬣封。菊花垂湿露，棘径卧干蓬。松柏愁香涩，南原几夜风！

### 客游

悲满千里心，日暖南山石。不谒承明庐，老作平原客。四时别家庙，三年

去乡国。旅歌屡弹铗，归问时裂帛。

崇义里滞雨

落漠谁家子？来感长安秋。壮年抱羁恨，梦泣生白头。瘦马秣败草，雨沫飘寒沟。南宫古帘暗，湿景传签筹。家山远千里，云脚天东头。忧眠枕剑匣，客帐梦封侯。

冯小怜

湾头见小怜，请上琵琶弦。破得东风恨，今朝值几钱？裙垂竹叶带，鬓湿杏花烟。玉冷红丝重，齐宫驾妾鞭。

赠陈商

长安有男儿，二十心已朽。《楞伽》堆案前，《楚辞》系肘后。人生有穷拙，日暮聊饮酒。只今道已塞，何必须白首？凄凄陈述圣，披褐鉏耒豆。学为尧舜文，时人责衰偶。柴门车辙冻，日下榆影瘦。黄昏访我来，苦节青阳皱。太华五千仞，劈地抽森秀。旁苦无寸寻，一上戛牛斗。公卿纵不怜，宁能锁吾口？李生师太华，大坐看白昼。逢霜作朴■〈木敕〉，得气为春柳。礼节乃相去，憔悴如刍狗。风雪直斋坛，墨组贯铜绶。臣妾气态间，唯欲承箕帚。天眼何时开？古剑庸一吼。

钓鱼诗

秋水钓红渠，仙人待素书。菱丝萦独茧，菰米蛰双鱼。斜竹垂清沼，长纶贯碧虚。饵悬春蜥蜴，钩坠小蟾蜍。詹子情无限，龙阳恨有余。为看烟浦上，楚女泪沾裾。

奉和二兄罢使遣马归延州

空留三尺剑，不用一丸泥。马向沙场去，人归故国来。笛愁翻《陇水》，酒喜沥春灰。锦带休惊雁，罗衣向斗鸡。还吴已渺渺，入郢莫凄凄。自是桃李树，何患不成蹊？

答赠

本是张公子，曾名萼绿华。沉香熏小像，杨柳伴啼鸦。露重金泥冷，杯阑玉树斜。琴堂沽酒客，新买后园花。

题赵生壁

大妇然竹根，中妇舂玉屑。冬暖拾松枝，日烟生蒙灭。木藓青桐老，石泉水声发。曝背卧东亭，桃花满肌骨。

感春

日暖自萧条，花悲北郭骚。榆穿莱子眼，柳断舞儿腰。上幕迎神燕，飞丝送百劳。胡琴今日恨，急语向檀槽。

仙人

弹琴石壁上，翻翻一仙人。手持白鸾尾，夜扫南山云。鹿饮寒涧下，鱼归清海滨。当时汉武帝，书报桃花春。

### 河阳歌

染罗衣，秋蓝难着色。不是无心人，为作台邛客。花烧中潭城，颜郎身已老。惜许两少年，抽心似春草。今日见银牌，今夜鸣玉晏。牛头高一尺，隔坐应相见。月从东方来，酒从东方转。觥船饫口红，蜜炬千枝烂。

### 花游曲【并序】

寒食诸王妓游，贺入座，因采梁简文诗调赋《花游曲》，与妓弹唱。

春柳南陌态，冷花寒露恣。今朝醉城外，拂镜浓扫眉。烟湿愁车重，红油覆画衣。舞裙香不暖，酒色上来迟。

### 春昼

朱城报春更漏转，光风催兰吹小殿。草细堪梳，柳长如线。卷衣秦帝，扫粉赵燕。日含画幕，蜂上罗荐。平阳花坞，河阳花县。越妇搯机，吴蚕作茧。菱汀系带，荷塘倚扇。江南有情，塞北无限。

### 安乐宫

深井桐乌起，尚复牵清水。未盥邵陵瓜，瓶中弄长翠。新成安乐宫，宫如凤凰翅。歌回蜡板鸣，左馆提壶使。绿繁悲水曲，茱萸别秋子。

### 蝴蝶舞

杨花扑帐春云热，龟甲屏风醉眼缬。东家蝴蝶西家飞，白骑少年今日归。

### 梁公子

风采出萧家，本是菖蒲花。南塘莲子熟，洗马走江沙。御笺银沫冷，长簟凤窠斜。种柳营中暗，题书赐馆娃。

### 牡丹种曲

莲枝未长秦蘅老，走马驮金斫春草。水灌香泥却月盆，一夜绿房迎白晓。美人醉语园中烟，晚花已散蝶又阑。梁王老去罗衣在，拂袖风吹《蜀国弦》。归霞帔拖蜀帐昏，嫣红落粉罢承恩。檀郎、谢女眠何处？楼台月明燕夜语。

### 后园凿井歌

井上辘轳床上转，水声繁，弦声浅。情若何？荀奉倩。城头日，长向城头住。一日作千年，不须流下去。

### 开愁歌【花下作】

秋风吹地百草干，华容碧影生晚寒。我当二十不得意，一心愁谢如枯兰。衣如飞鹑马如狗，临岐击剑生铜吼。旗亭下马解秋衣，请贳宜阳一壶酒。壶中唤天云不开，白昼万里闲凄迷。主人劝我养心骨，莫受俗物相填膺。

### 秦宫诗【并序】

汉秦宫，将军梁冀之嬖奴也。秦宫得宠内舍，故以骄名大噪于人。予抚旧而作长辞，辞以冯子都之事相为对望，又云昔有之诗。

越罗衫袂迎春风，玉刻麒麟腰带红。楼头曲宴仙人语，帐底吹笙香雾浓。人间酒暖春茫茫，花枝入帘白日长。飞窗复道传筹饮，十夜铜盘腻烛黄。秃襟小袖调鹦鹉，紫绣麻踏哮虎。斫桂烧金待晓筵，白鹿清酥夜半煮。桐英永巷骑新马，内屋深屏生色画。开门烂用水衡钱，卷起黄河向身泻。皇天厄运犹曾裂，秦宫一生花底活。鸾篋夺得不还人，醉睡氍毹满堂月。

#### 古邺城童子谣效王粲刺曹操

邺城中，暮尘起。探黑丸，斫文吏。棘为鞭，虎为马。团团走，邺城下。切玉剑，射日弓。献何人？奉相公。扶毂来，关右儿。香扫涂，相公归。

#### 杨生青花紫石砚歌

端州石工巧如神，踏天磨刀割紫云。佣刊抱水含满唇，暗洒苌弘冷血痕。纱帷昼暖墨花春，轻沲漂沫松麝薰。干腻薄重立脚匀，数寸光秋无日昏。圆毫促点声静新，孔砚宽顽何足云！

#### 房中思

新桂如蛾眉，秋风吹小绿。行轮出门去，玉鸾声断续。月轩下风露，晓庭自幽涩。谁能事贞素？卧听莎鸡泣。

#### 石城晓

月落大堤上，女垣栖乌起。细露湿团红，寒香解夜醉。女牛渡天河，柳烟满城曲。上客留断缨，残蛾斗双绿。春帐依微蝉翼罗，横茵突金隐体花。帐前轻絮鹅毛起，欲说春心无所似。

#### 苦昼短

飞光飞光，劝尔一杯酒。吾不识青天高，黄地厚，惟见月寒日暖，来煎人寿。食熊则肥，食蛙则瘦。神君何在，太一安有？天东有若木，下置衔烛龙。吾将斩龙足，嚼龙肉，使之朝不得回，夜不得伏。自然老者不死，少者不哭。何为服黄金，吞白玉？谁是任公子，云中骑白驴？刘彻茂陵多滞骨，嬴政梓棺费鲍鱼。

#### 章和二年中

云萧索田风拂拂，麦芒如彗黍如粟。关中父老百领襦，关东吏人乏诟租。健犍春耕土膏黑，莠蒲丛丛沿水脉。殷勤为我下田租，百钱携偿丝桐客。游春漫光坞花白，野林散香神降席。拜神得寿献天子，七星贯断姮娥死。

#### 春归昌谷

束发方读书，谋身苦不早。终军未乘传，颜子鬓先老。天网信崇大，矫士常慄慄。逸目骈甘华，羁心如荼蓼。旱云二三月，岑岫相颠倒。谁揭赉玉盘

，东方发红照。春热张鹤盖，兔目官槐小。思焦面如病，尝胆肠似绞。京国心烂漫，夜梦归家少。发轫东门外，天地皆浩浩。青树骊山头，花风满秦道。宫台光错落，装画遍峰峤。细绿及团红，当路杂啼笑。香气下高广，鞍马正华耀。独乘鸡栖车，自觉少风调。心曲语形影，只身焉足乐！岂能脱负担？刻鹄曾无兆。幽幽太华侧，老柏如建纛。龙皮相排戛，翠羽更荡掉。驱趋委憔悴，眺览强笑貌。花蔓阁行辀，縠烟暝深徼。少健无所就，入门愧家老。听讲依大树，观书临曲沼。知非出柙虎，甘作藏雾豹。韩鸟处缢缴，湘儵在笼罩。狭行无廓路，壮士徒轻躁。

### 昌谷诗【五月二十七日作】

昌谷五月稻，细青满平水。遥峦相压叠，颓绿愁堕地。光洁无秋思，凉旷吹浮媚。竹香满凄寂，粉节涂生翠。草发垂恨鬓，光露泣幽泪。层围烂洞曲，芳径老红醉。攒虫攫古柳，蝉于鸣高邃。大带委黄葛，紫蒲交狭洫。石钱差复籍，厚叶皆蟠膩。汰沙好平白，立马印青字。晚鳞自遨游，瘦鹄暝单峙。嘹嘹湿姑声，咽源惊溅起。纾缓玉真路，神娥蕙花里。苔絮紫涧砾，山实垂赭紫。小柏俨重扇，肥松突丹髓。鸣流走响韵，垄秋拖光穠。莺唱閼女歌，瀑悬楚练帔。风露满笑眼，骈岩杂舒坠。乱條迸石岭，细颈喧岛毖。日脚扫昏翳，新云启华閼。湔湔厌夏光，商风道清气。高眠复玉容，烧桂祀天几。雾衣夜披拂，眠坛梦真粹。待驾栖鸾老，故宫椒壁圯。鸿珑数铃响，羈臣发凉思。阴藤束朱键，龙帐着魑魅。碧锦帖花桎，香衾事残贵。歌尘蠹木在，舞彩长云似。珍壤割绣段，里俗祖风义。邻凶不相杵，疫病无邪祀。鲐皮识仁惠，兕角知覩耻。县省司刑官，户乏诟租吏。竹藪添堕简，石矶引钩饵。溪湾转水带，芭蕉倾蜀纸。岑光晃縠襟，孤景拂繁事。泉樽陶宰酒，月眉谢郎妓。丁丁幽钟远，矫矫单飞至。霞巘殷嵯峨，危溜声争次。淡蛾流平碧，薄月眇阴悴。凉光入涧岸，廓尽山中意。渔童下宵网，霜禽竦烟翅。潭镜滑蛟涎，浮珠噉鱼戏。风桐瑶匣瑟，萤星锦城使。柳缀长缥带，篁掉短笛吹。石根缘绿藓，芦笋抽丹渍。漂旋弄天影，古桧挐云臂。愁月薇帐红，冒云香蔓刺。芒麦平百井，闲乘列千肆。刺促成纪人，好学鸱夷子。

### 铜驼悲

落魄三月罢，寻花去东家。谁作《送春曲》？洛岸悲铜驼。桥南多马客，北山饶古人。客饮杯中酒，驼悲千万春。生世莫徒劳，风吹盘上烛。厌见桃株笑，铜驼夜来哭。

### 自昌谷到洛后门

九月大野白，苍岑竦秋门。寒凉十月末，雪霰濛晓昏。淡色结昼天，心事填空云。道上千里风，野竹蛇涎痕。石涧冻波声，鸡叫清寒晨。强行到东舍

，解马投旧邻。东家名廖者，乡曲传姓辛。杖头非饮酒，吾请造其人。始欲南去楚，又将西适秦。襄王与武帝，各自留青春。闻道兰台上，宋玉无归魂。缃缥两行字，蛰虫蠹秋芸。为探秦台意，岂命余负薪？

七月一日晓入太行山

一夕绕山秋，香露溼蒙蒙。新桥倚云阪，候虫嘶露朴。洛南今已远，越衾谁为熟？石气何凄凄，老莎如短簇。

秋凉诗寄正字十二兄

闭门感秋风，幽姿任契阔。大野生素空，天地旷肃杀。露光泣残蕙，虫响连夜发。房寒寸辉薄，迎风绛纱折。披书古芸馥，恨唱华容歇。百日不相知，花光变凉节。弟兄谁念虑，笺翰既通达。青袍度白马，草简奏东阙。梦中相聚笑，觉见半床月。长思剧循环，乱忧抵覃葛。

## 卷四

艾如张

锦襜褕，绣裆襦。强饮啄，哺尔雏。陇东卧穽满风雨，莫信笼媒陇西去。齐人织网如素空，张在野田平碧中。网丝漠漠无形影，误尔触之伤首红。艾叶绿花谁翦刻？中藏祸机不可测。

上云乐

飞香走红满天春，花龙盘盘上紫云。三千宫女列金屋，五十弦瑟海上闻。天江碎碎银沙路，赢女机中断烟素。缝舞衣，八月一日君前舞。

摩多楼子

玉塞去金人，二万四千里。风吹沙作云，一时渡辽水。天白水如练，甲丝双串断。行行莫苦辛，城月犹残半。晓气朔烟上，赳赳胡马蹄。行人临水别，陇水长东西。

猛虎行

长戈莫春，强弩莫抨。乳孙哺子，教得生狞。举头为城，掉尾为旌。东海黄公，愁见夜行。道逢驺虞，牛哀不平。何用尺刀？壁上雷鸣！泰山之下，妇人哭声。官家有程，吏不敢听。

日出行

白日下昆仑，发光如舒丝。徒照葵藿心，不照游子悲。折折黄河曲，日从中央转。旸谷耳曾闻，若木眼不见。奈尔铄石，胡为销人？羿能弯弓属矢，那不中足？令乌不得翔，火不得奔，诘教晨光夕昏！

苦篁调啸引

请说轩辕在时事，伶伦采竹二十四。伶伦采之自昆邱，轩辕诏遣中分作十

二。伶伦以之正音律，轩辕以之调元气。当时黄帝上天时，二十三管咸相随。唯留一管人间吹，无德不能得此管，此管沉埋虞舜祠。

### 拂舞歌辞

吴娥声绝天，空云闲裴回。门外满车马，亦须生绿苔。樽有乌程酒，劝君千万寿。全胜汉武锦楼上，晓望晴寒饮花露。东方日不破，天光无老时。丹成作蛇乘白雾，千年重化玉井土。从蛇作土二千载，吴堤绿草年年在。背有八卦称神仙，邪鳞顽甲滑腥涎。

### 夜坐吟

踏踏马蹄谁见过？眼看北斗直天河。西风罗幕生翠波，铅华笑妾颦青娥。为君起唱《长相思》，帘外严霜皆倒飞。明星烂烂东方陲，红霞稍出东南涯，陆郎去矣乘斑骝。

### 箜篌引

公乎公乎，提壶将焉如？屈平沉湘不足慕，徐衍入海诚为愚。公乎公乎，床有菅席盘有鱼。北里有贤兄，东邻有小姑。陇亩油油黍与葫，瓦甒浊醪蚁浮浮。黍可食，醪可饮，公乎公乎其奈居！被发奔流竟何如？贤兄小姑哭呜呜。

### 巫山高

碧丛丛，高插天，大江翻澜神曳烟。楚魂寻梦风飏然，晓风飞雨生苔钱。瑶姬一去一千年，丁香筇竹啼老猿。古祠近月蟾桂寒，椒花坠红湿云间。

### 平城下

饥寒平城下，夜夜守明月。别剑无玉花，海风断鬓发。塞长连白空，遥见汉旗红。青帐吹短笛，烟雾湿画龙。日晚在城上，依稀望城下。风吹枯蓬起，城中嘶瘦马。借问筑城吏：“去关几千里？”惟愁裹尸归，不惜倒戈死！

### 江南弄

江中绿雾起凉波，天上叠巘红嵯峨。水风浦云生老竹，渚暝蒲帆如一幅。鲈鱼千头酒百斛，酒中倒卧南山绿。吴越吟未终曲，江上团团贴寒玉。

### 荣华乐

鸢肩公子二十余，齿编贝，唇激朱。气如虹霓，饮如建瓴，走马夜归叫严更。径穿复道游椒房，龙裘金玦杂花光。玉堂调笑金楼子，台下戏学邯郸倡。口吟舌话称女郎，锦绣面汉帝旁。得明珠十斛，白璧一双，新诏垂金曳紫光煌煌。马如飞，人如水，九卿六官皆望履。将回日月先反掌，欲作江河惟画地。峨峨虎冠上切云，竦剑晨趋凌紫氛。绣段千寻贻皂隶，黄金百镒贶家臣。十二门前张大宅，晴春烟起连天碧。金铺缀日杂红光，铜龙啖环似争力。瑶姬凝醉卧芳席，海素笼窗空下隔。丹穴取凤充行庖，攫攫如拳那足食？金蟾呀呀兰烛

香，军装武妓声琅琅。谁知花雨夜来过？但见池台春草长。嘈嘈弦吹匝天开，洪崖箫声绕天来。天长一矢贯双虎，云弭绝骋聒旱雷。乱袖交竿管儿舞，吴音绿鸟学言语。能教刻石平紫金，解送刻毛寄新兔。三皇后，七贵人，五十校尉二将军。当时飞去逐彩云，化作今日京华春。

### 相劝酒

羲和骋六辔，昼夕不曾闲。弹乌崦嵫竹，扶马蟠桃鞭。蓐收既断翠柳，青帝又造红兰。尧舜至今万万岁，数子将为倾盖间。青钱白璧买无端，丈夫快意方为欢。臞蠡臞熊何足云？会须钟饮北海，箕踞南山。歌淫淫，管悖悖，横波好送雕题金。人之得意且如此，何用强知元化心？相劝酒，终无辍。伏愿陛下鸿名终不歇，子孙绵如石上葛。来长安，车骈骈，中有梁冀旧宅，石崇故园。

### 瑶华乐

穆天子，走龙媒。八辔冬珑逐天回，五精扫地凝云开。高门左右日月环，四方错镂棱层殷。舞霞垂尾长盘跚，江澄海净神母颜。施红点翠照虞泉，曳云拖玉下昆山。列旆如松，张盖如轮。金风殿秋，清明发春。八鸾十乘，矗如云屯。琼钟瑶席甘露文，玄霜绛雪何足云？薰梅染柳将赠君，铅华之水洗君骨，与君相对作真质。

### 北中寒

一方黑照三方紫，黄河冰合鱼龙死。三尺木皮断文理，百石强车上河水。霜花草上大如钱，挥刀不入迷蒙天。争海水飞凌喧，山瀑无声玉虹悬。

### 梁台古意

梁王台沼空中立，天河之水夜飞入。台前斗玉作蛟龙，绿粉扫天愁露湿。撞钟饮酒行射天，金虎蹙裘喷血斑。朝朝暮暮愁海翻，长绳系日乐当年。芙蓉凝红得秋色，兰脸别春啼脉脉。芦洲客雁报春来，寥落野湟秋漫白。

### 公无出门

天茫茫，地密密。熊虺食人魂，雪霜断人骨。喉犬唁唁相索索，薰掌偏宜佩兰客。帝遣乘轩灾自灭，玉星点剑黄金钺。我虽跨马不得还，历阳湖波大如山。毒虬相视振金环，狻猊■〈豸契〉貅吐嚙涎。鲍焦一世披草眠，颜回廿九鬓毛斑。颜回非血衰，鲍焦不违天。天畏遭衔啮，所以致之然。分明犹惧公不信，公看呵壁书问天。

### 神弦曲

西山日没东山昏，旋风吹马马踏云。画弦素管声浅繁，花裙綵■〈纟蔡〉步秋尘。桂叶刷风桂坠子，青狸哭血寒狐死。古壁彩虬金帖尾，雨工骑入秋潭水。百年老鸮成木魅，笑声碧火巢中起。

### 神弦

女巫浇酒云满空，玉炉炭火香瞿瞿。海神山鬼来座中，纸钱窸窣鸣飗风。  
相思木帖金舞鸾，攒蛾一啼重一弹。呼星召鬼歆杯盘，山魅食时人森寒。终南  
日色低平湾，神兮长在有无间。神噉神喜师更颜，送神万骑还青山。

### 神弦别曲

巫山小女隔云别，春风松花山上发。绿盖独穿香径归，白马花竿前孑孑。  
蜀江风淡水如罗，堕兰谁泛相经过？南山桂树为君死，云衫浅污胭脂花。

### 绿水词

今宵好风月，阿侯在何处？为有倾人色，翻成足愁苦。东湖采莲叶，南湖  
拔蒲根。未持寄小姑，且持感愁魂。

### 沙路曲

柳脸半眠丞相树，珮马钉铃踏沙路。断烬遗香袅翠烟，烛骑蹄鸣上天去。  
帝家玉龙开九关，帝前动笏移南山。独垂重印押千官，金窠篆字红屈盘。沙路  
归来闻好语，旱火不光天下雨。

### 上之回

上之回，大旗喜。悬红云，挹凤尾。剑匣破，舞蛟龙。蚩尤死，鼓逢逢。  
天高庆雷齐堕地，地无惊烟海千里。

高轩过【韩员外愈、皇甫侍御湜见过，因而命作。】

华裾织翠青如葱，金环压轡摇玲珑，马蹄隐耳声隆隆。入门下马气如虹，  
云是东京才子，文章巨公。二十八宿罗心胸，元精耿耿贯当中；殿前作赋声  
摩空，笔补造化天无功。庞眉书客感秋蓬，谁知死草生华风。我今垂翅附冥鸿，  
他日不羞蛇作龙。

### 贝宫夫人

丁丁海女弄金环，雀钗翘揭双翅关。六宫不语一生闲，高悬银榜照青山。  
长眉凝绿几千年，清凉堪老镜中鸾。秋肌稍觉玉衣寒，空光帖妥水如天。

### 兰香神女庙【三月中作】

古春年年在，闲绿摇暖云。松香飞晚华，柳渚含日昏。沙炮落红满，石泉  
生水芹。幽篁画新粉，蛾绿横晓门。弱蕙不胜露，山秀愁空春。舞翦鸾翼，帐  
带涂轻银。兰桂吹浓香，菱藕长莘莘。看雨逢瑶姬，乘船值江君。吹箫饮酒醉，  
结绶金丝裙。走天呵白鹿，游水鞭锦鳞。密发虚鬟飞，腻颊凝花匀。团鬓分  
珠窠，浓眉笼小唇。弄蝶和轻妍，风光怯腰身。深帏金鸭冷，奁镜幽凤尘。踏  
雾乘风归，撼玉山上门。

### 送韦仁实兄弟入关

送客饮别酒，千觴无赭颜。何物最伤心？马首鸣金环。野色浩无主，秋明  
空旷间。坐来壮胆破，断目不能看。行槐引西道，青稍长攢攢。韦郎好兄弟

，叠玉生文翰。我在山上舍，一亩蒿硖田。夜雨叫租吏，春声暗交关。谁解念劳劳？苍突唯南山。

### 洛阳城外别皇甫湜

洛阳吹别风，龙门起断烟。冬树束生涩，晚紫凝华天。单身野霜上，疲马飞蓬间。凭轩一双泪，奉堕绿衣前。

### 溪晚凉

白狐向月号山风，秋寒扫云留碧空。玉烟青湿白如幢，银湾晓转流天东。溪汀眠鹭梦征鸿，轻涟不语细游溶。层岫回岑复叠龙，苦篁对客吟歌筒。

### 官不来题皇甫湜先辈厅

官不来，官庭秋，老桐错干青龙愁。书司曹佐走如牛，叠声问佐官来否？官不来，门幽幽。

### 长平箭头歌

漆灰骨末丹水砂，淒淒古血生铜花。白翎金镞雨中尽，直余三脊残狼牙。我寻平原乘两马，驿东石田蒿坞下。风长日短星萧萧，黑旗云湿悬空夜。左魂右魄啼肌瘦，酪瓶倒尽将羊炙。虫栖雁病芦笋红，回风送客吹阴火。访古洹瀾收断镞，折锋赤璽曾璽肉。南陌东城马上儿，劝我将金换簪竹。

### 江楼曲

楼前流水江陵道，鲤鱼风起芙蓉老。晓钗催鬓语南风，抽帆归来一日功。鼉吟浦口飞梅雨，竿头洒旗换青苧。萧骚浪白云差池，黄粉油衫寄郎主。新槽酒声苦无力，南湖一顷菱花白。眼前便有千里思，小玉开屏见山色。

### 塞下曲

胡角引北风，蓟门白于水。天含青海道，城头月千里。露下旗濛濛，寒金鸣夜刻。蕃甲锁蛇鳞，马嘶青冢白。秋静见旄头，沙远席羁愁。帐北天应尽，河声出塞流。

### 染丝上春机

玉甃汲水桐花井，蒨丝沉水如云影。美人懒态燕脂愁，春梭抛掷鸣高楼。彩线结茸背复叠，白袷玉郎寄桃叶。为君挑鸾作腰绶，愿君处处宜春酒。

### 五粒小松歌【并序】

前谢秀才、杜云卿命予作《五粒小松歌》，予以选书多事，不治曲辞。经十日，聊道八句，以当命意。

蛇子蛇孙鳞蜿蜿，新香几粒洪崖饭。绿波浸叶满浓光，细束龙髯铰刀剪。主人壁上铺州图，主人堂前多俗儒。月明白露秋泪滴，石笋溪云肯寄书？

### 塘上行

藕花凉露湿，花缺藕根涩。飞下雌鸳鸯，塘水声溘溘。

### 吕将军歌

吕将军，骑赤兔，独携大胆出秦门，金粟堆边哭陵树。北方逆气污青天，剑龙夜叫将军闲。将军振袖拂剑锷，玉阙朱城有门阁。榼榼银龟摇白马，傅粉女郎火旗下。恒山铁骑请金枪，遥闻箛中花箭香。西郊寒蓬叶如刺，皇天新栽养神骥。厩中高桁排蹇蹄，饱食青刍饮白水。圆苍低迷盖张地，九州人事皆如此。赤山秀铤御时英，绿眼将军会天意。

### 休洗红

休洗红，洗多红色浅。卿卿骋少年，昨日殷桥见。封侯早归来，莫作弦上箭。

### 野歌

鸦翎羽箭山桑弓，仰天射落衔芦鸿。麻衣黑肥冲北风，带酒日晚歌田中。男儿屈穷心不穷，枯荣不等嗔天公。寒风又变为春柳，条条看即烟濛濛。

### 将进酒

琉璃钟，琥珀浓，小槽酒滴真珠红。烹龙炮凤玉脂泣，罗帏绣幕围香风。吹龙笛，击鼙鼓。皓齿歌，细腰舞。况是青春日将暮，桃花乱落如红雨。劝君终日酩酊醉，酒不到刘伶坟上土！

### 美人梳头歌

西施晓梦绡帐寒，香鬟堕髻半沉檀。辘轳咿哑转鸣玉，惊起芙蓉睡新足。双鸾开镜秋水光，解鬟临镜立象床。一编香丝云撒地，玉钗落处无声飏。纤手却盘老鸦色，翠滑宝钗簪不得。春风烂漫恼娇慵，十八鬟多无气力。妆成■〈髟上委下〉髻欹不斜，云裾数步踏雁沙。背人不语向何处？下阶自折樱桃花。

### 月漉漉篇

月漉漉，波烟玉。莎青桂花繁，芙蓉别江木。粉态罗袂寒，雁羽铺烟湿。谁能看石帆？乘船镜中入。秋白鲜红死，水香莲子齐。挽菱隔歌袖，绿刺冒银泥。

### 京城

驱马出门意，牢落长安心。两事向谁道？自作秋风吟。

### 官街鼓

晓声隆隆催转日，暮声隆隆催月出。汉城黄柳映新帘，柏陵飞燕埋香骨。槌碎千年日长白，孝武秦皇听不得。从君翠发芦花色，独共南山守中国。几回天上葬神仙？漏声相将无断绝。

### 许公子郑姬歌【郑园中请贺作】

许史世家外亲贵，宫锦千端买沉醉。铜驼酒熟烘明胶，古堤大柳烟中翠。桂开客花名郑袖，入洛闻香鼎门口。先将芍药献妆台，后解黄金大如斗。莫愁

帘中许合欢，清弦五十为君弹。弹声咽春弄君骨，骨兴牵人马上鞍。两马八蹄踏兰苑，情如合竹谁能见！夜光玉枕栖凤凰，衿罗当门刺纯线。长翻蜀纸卷《明君》，转角含商破碧云。自从小厝来东道，曲里长眉少见人。相如冢上生秋柏，三秦谁是言情客？蛾鬟醉眼拜诸宗，为谒皇孙请曹植。

### 新夏歌

晓木千笼真蜡彩，落蒂枯香数分在。阴枝拳芽卷缥茸，长风回气扶葱茏。野家麦畦上新垅，长畛徘徊桑柘重。刺香满地菖蒲草，雨梁燕语悲身老。三月摇杨入河道，天浓地浓柳梳扫。

### 题归梦

长安风雨夜，书客梦昌谷。怡怡中堂笑，小弟裁涧蓂。家门厚重意，望我饱饥腹。劳劳一寸心，灯花照鱼目。

### 经沙苑

野水泛长澜，宫牙开小蒨。无人柳自春，草渚鸳鸯暖。晴嘶卧沙马，老去悲啼展。今春还不归，塞嚶折翅雁。

### 出城别张又新酬李汉

李子别上国，南山崆峒春。不闻今夕鼓，差慰煎情人。赵壹赋命薄，马卿家业贫。乡书何所报？紫蕨生石云。长安玉桂国，戟带披侯门。惨阴地自光，宝马踏晓昏。腊春戏草苑，玉挽鸣■〈穩，車代禾〉麟。绿网缁金铃，霞卷清地漘。开贯泻蚨母，买冰防夏蝇。时宜裂大被，剑客车盘茵。小人如死灰，心切生秋榛。皇图跨四海，百姓施长绅。光明霭不发，腰龟徒斲银。吾将噪礼乐，声调摩清新。欲使十千岁，帝道如飞神。华实自苍老，流来长倾盆。没没暗齟舌，涕血不敢论。今将下东道，祭酒而别秦。六郡无剿儿，长刀谁拭尘？地理阳无正，快马逐服辕。二子美年少，调道讲清浑。讥笑断冬夜，家庭疏篠穿。曙风起四方，秋月当东悬。赋诗面投掷，悲哉不遇人。此别定沾臆，越布先裁巾。

## 外集

### 南园

方领蕙带折角巾，杜若已老兰苕春。南山削秀蓝玉合，小雨归去飞凉云。熟杏暖香梨叶老，草稍竹栅锁池痕。郑公乡老开酒樽，坐泛楚奏吟《招魂》。

### 假龙吟歌

石轧铜杯，吟咏枯瘁。苍鹰摆血，白凤下肺。桂子自落，云弄车盖。木死沙崩恶溪岛，阿母得仙今不老。窞中跳汰截清涎，隈壖卧水埋金爪。崖磴苍苍吊石发，江君掩帐笈篴折。莲花去国一千年，雨后闻腥犹带铁。

### 感讽六首

人闲春荡荡，帐暖香扬扬。飞光染幽红，夸娇来洞房。舞席泥金蛇，桐竹罗花床。眼逐春暝醉，粉随泪色黄。王子下马来，曲沼鸣鸳鸯。焉知肠车转，一夕巡九方？

### 其二

苦风吹朔寒，沙惊秦木折。舞影逐空天，画鼓余清节。蜀书秋信断，黑水朝波咽。娇魂从回风，死处悬乡月。

### 其三

杂杂胡马尘，森森边士戟。天教胡马战，晓云皆血色。妇人携汉卒，箭箠囊巾帼。不惭金印重，踉蹌腰鞬力。恂恂乡门老，昨夜试锋镝。走马遣书勋，谁能分粉墨？

### 其四

青门放弹去，马色连空郊。何年帝家物？玉装鞍上摇。去去走犬归，来来坐烹羔。千金不了馔，猪肉称盘臊。试问谁家子，乃老能佩刀？西山白盖下，贤隽寒萧萧。

### 其五

晓菊炫寒露，似悲团扇风。秋凉经汉殿，班子泣衰红。本无辞辇意，岂见入空宫？腰极佩珠断，灰蝶生阴松。

### 其六

蝶飞红粉台，柳扫吹笙道。十日悬户庭，九秋无衰草。调歌送风转，杯池白鱼小。水宴截香腴，菱科映青罩。蓼蒙梨花满，春昏弄长啸。惟愁苦花落，不悟世衰到。抚旧惟销魂，南山坐悲峭。

### 莫愁曲

草生龙坡下，鸦噪城堞头。何人此城里？城角栽石榴。青丝系五马，黄金络双牛。白鱼驾莲船，夜作十里游。归来无人识，暗上沉香楼。罗床倚瑶瑟，残月倾帘钩。今日槿花落，明朝桐树秋。莫负平生意，何名何莫愁？

### 夜来乐

红罗复帐金流苏，华灯九枝悬鲤鱼。丽人映月开铜铺，春水滴酒猩猩沽。价重一筐香十株，赤金瓜子兼杂麸。五色丝封青玉帛，阿侯此笑千万余。南轩汉转帘影疏，桐林哑哑挟子乌。剑崖鞭节青石珠，白驄吹湍凝霜须。漏长送珮承明庐，倡楼嵯峨明月孤。续客下马故客去，绿蝉秀黛重拂梳。

### 嘲雪

昨日发葱岭，今朝下兰渚。喜从千里来，乱笑含春语。龙沙湿汉旗，凤扇迎秦素。久别辽城鹤，毛衣已应故。

### 春怀引

芳溪密影成花洞，柳结浓烟花带重。蟾蜍碾玉挂明弓，捍拨装金打仙凤。  
宝枕垂云选春梦，钿合碧寒龙脑冻。阿侯系锦觅周郎，凭仗东风好相送。

### 白虎行

火乌日暗崩腾云，秦王虎视苍生群。烧书灭国无暇日，铸剑佩玦呼将军。  
玉坛设醮思冲天，一世二世当万年。烧丹未得不死药，拿舟海上寻神仙。鲸鱼  
张鬣海波沸，耕人半作征人鬼。雄豪猛焰烈烧空，无人为决天河水。谁最苦兮  
谁最苦？报人义士深相许。渐离击筑荆卿歌，荆卿把酒燕丹语。剑如霜兮胆如  
铁，出燕城兮望秦月。天授秦封祚未终，袞龙衣点荆卿血。朱旗卓地白虎死  
，汉王知是真天子。

### 有所思

去年陌上歌离曲，今日君书远游蜀。帘外花开二月风，台前泪滴千行竹。  
琴心与妾肠，此夜断还续。想君白马悬雕弓，世间何处无春风？君心未肯镇如  
石，妾颜不久如花红。夜残高碧横长河，河上无梁空白波。西风未起悲龙梭  
，年年织素攒双蛾。江山迢递无休绝，泪眼看灯乍明灭。自从孤馆深锁窗，桂  
花几度圆还缺！鸦鸦向晓鸣森木，风过池塘响丛玉。白日萧条梦不成，桥南更  
问仙人卜。

### 嘲少年

青骢马肥金鞍光，龙脑入缕罗衫香。美人狭坐飞琼觞，贫人唤云天上郎。  
别起高楼临碧篠，丝曳红鳞出深沼。有时半醉百花前，背把金丸落飞鸟。自说  
生来未为客，一生美妾过三百。岂知鬪地种田家，官税频催没人织？长金积玉  
夸豪毅，每揖闲人多意气。生来不读半行书，只把黄金买身贵。少年安得长少  
年？海波尚变为桑田。荣枯递转急如箭，天公岂肯于公偏！莫道韶华镇长在  
，发白面皱专相待。

### 高平县东私路

侵侵槲叶香，木花滞寒雨。今夕山上秋，永谢无人处。石溪远荒涩，棠实  
悬辛苦。古者定幽寻，呼君作私路。

### 神仙曲

碧峰海面藏灵书，上帝拣作仙人居。清明笑语闻空虚，斗乘巨浪骑鲸鱼。  
春罗书字邀王母，共宴红楼最深处。鹤羽冲风过海迟，不如却使青龙去。犹疑  
王母不相许，垂雾妖鬟更转语。

### 龙夜吟

鬓发胡儿眼睛绿，高楼夜静吹横竹。一声似向天上来，月下美人望乡哭。  
直排七点星藏指，暗合清风调宫徵。蜀道秋深云满林，湘江半夜龙惊起。玉堂

美人边塞情，碧窗皓月愁中听。寒砧能捣百尺练，粉泪凝珠滴红线。胡儿莫作《陇头吟》，隔窗暗结愁人心。

#### 昆仑使者

昆仑使者无消息，茂陵烟树生愁色。金盘玉露自淋漓，元气茫茫收不得。麒麟背上石文裂，虬龙鳞下红肢折。何处偏伤万国心？中天夜久高明月。

#### 汉唐姬饮酒歌

御服沾霜露，天衢长蓁棘。金隐秋尘姿，无人为带饰。玉堂歌声寝，芳林烟树隔。云阳台上歌，鬼哭复何益？仗剑明秋水，凶威屡胁逼。强枭噬母心，犇厉索人魄。相看两相泣，泪下如波激。宁用清酒为？欲作黄泉客。不说玉山颓，且无饮中色。勉从天帝诉，天上寡沉厄。无处张繡帷，如何望松柏？妾身昼团团，君魂夜寂寂。蛾眉自觉长，颈粉谁怜白！矜持昭阳意，不肯看南陌。

#### 听颖师弹琴歌

别浦云归桂花渚，蜀国弦中双凤语。芙蓉叶落秋鸾离，越王夜起游天姥。暗佩清臣敲水玉，渡海蛾眉牵白鹿。谁看挟剑赴长桥，谁看浸发题春竹？竺僧前立当吾门，梵宫真相眉棱尊。古琴大轸长八尺，峯阳老树非桐孙。凉馆闻弦惊病客，药囊暂别龙须席。请歌直请卿相歌，奉礼官卑复何益？

#### 谣俗

上林胡蝶小，试伴汉家君。飞向南城去，误落石榴裙。脉脉花满树，翾翾燕绕云。出门不识路，羞问陌头人。

#### 补遗

##### 静女春曙曲

嫩蝶怜芳抱新蕊，泣露枝枝滴天泪。粉窗香咽颓晓云，锦堆花密藏春睡。恋屏孔雀摇金尾，莺舌分明呼婢子。冰洞寒龙半匣水，一只商鸾逐烟起。

##### 少年乐

芳草落花如锦地，二十长游醉乡里。红缨不动白马骄，垂柳金丝香拂水。吴娥未笑花不开，绿鬟耸堕兰云起。陆郎倚醉牵罗袂，夺得宝钗金翡翠。

#### 李长吉小传

京兆杜牧为李长吉集叙，状长吉之奇甚尽，世传之。长吉姊嫁王氏者，语长吉之事尤备。长吉细瘦，通眉，长指爪。能苦吟疾书，最先为昌黎韩愈所知。所与游者，王参元、杨敬之、权璩、崔植辈为密。每旦日出与诸公游，未尝得题然后为诗，如他人思量牵合以及程限为意。恒从小奚奴，骑距驴，背一古

破锦囊，遇有所得，即书投囊中。及暮归，太夫人使婢受囊出之，见所书多，辄曰：“是儿要当呕出心乃已尔！”上灯，与食，长吉从婢取书，研墨叠纸足成之，投他囊中。非大醉及吊丧日率如此，过亦不复省。王、杨辈时复来探取写去。长吉往往独骑往还京、洛，所至或时有著，随弃之，故沈子明家所余四卷而已。长吉将死时，忽昼见一绯衣人，驾赤虬，持一板书若太古篆或霹雳石文者，云：“当召长吉。”长吉了不能读，歛下榻叩头，言阿(上弥下女)老且病，贺不愿去。绯衣人笑曰：“帝成白玉楼，立召君为记。天上差乐，不苦也！”长吉独泣，边人尽见之。少之，长吉气绝。常所居窗中，(火亨)(火亨)有烟气，闻行车嚟管之声。太夫人急止人哭，待之如炊五斗黍许时，长吉竟死。王氏姊非能造作谓长吉者，实所见如此。呜呼！天苍苍而高也，上果有帝耶？帝果有苑囿宫室观阁之玩耶？苟信然，则天之高邈，帝之尊严，亦宜有人物文采愈此世者，何独眷眷于长吉而使其不寿耶？噫！又岂世所谓才而奇者，不独地上少，即天上亦不多耶？长吉生时二十七年，位不过奉礼太常，时人亦多排摈毁斥之。又岂才而奇者，帝独重之，而人反不重耶？又岂人见会胜帝耶？李商隐撰

溪生传李贺云：长吉常时旦日出游，从小奚奴，骑距驴，背一古破锦囊，遇有所得，即书投囊中。暮归，足成其文。余为儿时，在溧阳闻白头书佐言：孟东野，贞元中以前秀才，家贫，受溧阳尉。溧阳昔为平陵，县南五里有投金濑，濑南八里许道东有故平陵，城周千余步，基址陂陀，裁高三四尺。而草木势甚盛，率多大栎，合数十抱，藂条蒙翳，如坞如洞。地洼下，积水沮洳，深处可活鱼鳖辈。大抵幽邃岑寂，气候古澹可喜，除里民樵罩外无入者。东野得之忘归，或比日，或间日，乘驴领小吏经募投金渚一往。至，得荫大栎，隐岩蓀，坐于积水之旁，吟到日西还，尔后袞袞去，曹务多弛废。今秃躁卞急，不佳东野之为，立白王府，请以假尉代东野，分其俸以给之。东野竟以穷去。吾闻淫畋渔者，谓之暴天物。天物既不可暴，又可抉摘刻削，露其情状乎？使自萌卵至于槁死，不能隐伏，天能不致罚耶？长吉夭，东野穷，玉溪生官不挂朝籍而死，正坐是哉！正坐是哉！陆龟蒙书小传后